



Z A P I S N I K
7. sjednice Komisije za vanjsku trgovinu i carine
Predstavničkog doma Parlamentarne skupštine BiH,
održane 12. juna 2007. godine

Sjednica je počela u 17 sati.

Sjednicom je predsjedavala Snježana Rajilić, predsjedavajuća Komisije.

Sjednici su prisustvovali: Jerko Ivanković Lijanović, Mehmed Suljkanović, Ekrem Ajanović, Jozo Križanović, Šemsudin Mehmedović, Slavko Jovičić, Salko Sokolović i Hadži Jovan Mitrović, članovi Komisije.

Sjednici su prisustvovali: Sabrija Šerifović i Hajrudin Podbičanin, pomoćnici ministra vanjske trgovine i ekonomskih odnosa BiH, Momir Tošić, direktor Sektora za makroekonomski sistem u Vanjskotrgovinskoj komori BiH, i Emira Češljarić, sekretar Komisije.

Za sjednicu Komisije, s dopunjenom tačkom 2., predložen je i jednoglasno usvojen sljedeći

D N E V N I R E D

1. Davanje mišljenja Komisije Predstavničkom domu na Sporazum o izmjeni i pristupanju Centralnoevropskom sporazumu o slobodnoj trgovini (CEFTA 2006.),
2. Ponovno razmatranje i utvrđivanje konačnog prijedloga zakona o izmjenama i dopunama: Zakona o akcizama BiH, Zakona o carinskoj tarifi BiH i Zakona o carinskoj politici BiH,
3. Tekuća pitanja.

Ad-1.

Sabrija Šerifović istakao je da se nakon formiranja Pakta stabilnosti za Jugoistočnu Evropu krenulo u implementaciju Pakta II, s ciljem jačanja trgovinskih odnosa, te je, 27.7.2001., usvojen Memorandum o razumijevanju o potpisivanju bilateralnih ugovora o slobodnoj trgovini sa 31 zemljom u regionu. U toku 2005. godine počelo je pregovaranje na osnovu odredbi Zakona o postupku zaključivanja i izvršavanja međunarodnih ugovora („Službeni glasnik BiH“, br. 29/00).

Bosna i Hercegovine i Republika Srbija do sada, od osam zemalja, jedine nisu ratificirale CEFTA-u, jer su predlagale zaključke o usvajanju aneksa na Sporazum, te je postignut dogovor dodavanjem član 23. bis koji ima za cilj izjednačavanje uslova u regionu u pogledu trgovine.

Prvi put zemlje u regionu dobivaju dijagonalne akumulacije, tj. mogu uzimati dijelove materijala za proizvodnju robe iz drugih zemalja i prezentirati kao svoj proizvod. Sporazum o stabilizaciji i pridruživanju ima posebno poglavlje Regionalne saradnje koje predviđa primjenu i ratificiranje CEFTA-e.

Nikakve pravne radnje ne mogu se preduzimati dok CEFTA ne stupi na snagu.

Hajrudin Podbičanin rekao je da stav 1. člana 23. CEFTA-e daje mogućnost uvođenja zaštitnih mjera. Mišljenja je da Vijeću ministara BiH treba predložiti da usvoji zaključak za održavanje kontinuiteta odluka koje su na snazi.

Momir Tošić iz Vanjskotrgovinske komore BiH istakao je da VTKBiH podržava što skorije ratificiranje Sporazuma.

U raspravi su učestvovali: Jerko Ivanković Lijanović, Slavko Jovičić, Šemsudin Mehmedović, Jozo Križanović, Mehmed Suljkanović, Ekrem Ajanović, Hadži Jovan Mitrović i Salko Sokolović.

Jerko Ivanković Lijanović smatra da u dijelu Sporazuma koji se odnosi na poljoprivredu treba izvući maksimum pitajući - šta dobivamo članom 23.bis? Na osnovu dosadašnjih ugovora o slobodnoj trgovini, BiH ima ekonomske štete, a odluke koje je donijelo Vijeće ministara BiH na osnovu ovih ugovora ratifikacijom CEFTA-e prestaju važiti. Pročitao je formulaciju člana 23. bis CEFTA-e pitajući šta BiH dobiva ovim članom i predložio da Komisija usvoji zaključak, čiji je tekst podijeljen prisutnima na sjednici.

Slavko Jovičić sugerirao je da se ratifikacija CEFTA-e odgodi za kraće vrijeme uvažavajući mišljenje udruženja poljoprivrednih asocijacija, do realizacije zaključaka Komisije.

Šemsudin Mehmedović rekao je da treba preduzeti mjere za stimulaciju domaće proizvodnje, otkloniti barijere koje imaju proizvođači i imati garancije da će se bh. roba izvoziti.

Jozo Križanović nema rezerve kad je riječ o ratifikaciji CEFTA-e i smatra da Komisija treba slijediti usvojene zaključke i koristiti odredbe člana 23. Sporazuma. Stupanjem na snagu CEFTA-e prestaju važiti ugovori o slobodnoj trgovini s Republikom Hrvatskom i Srbijom. Lijek je u provođenju prijedloga mjera za povećanje izvoza i certifikaciju.

Mehmed Suljkanović rekao je da BiH treba kao strana prevazići negativna iskustva u proteklim godinama podržavajući zaključak koji je predložio Jerko Ivanković Lijanović. Treba koristiti sva rješenja u formiranju Ministarstva za poljoprivredu BiH.

Ekrem Ajanović smatra da rješenja o kojima se već govorilo ne donose nikakve mjere, jedini način je da se podrže ideje poljoprivrednih proizvođača formiranjem Ministarstva poljoprivrede BiH. Potrebne su mjere i odluke Vijeća ministara BiH za stimulaciju domaće proizvodnje koje bi se primjenjivale paralelno sa stupanjem na snagu CEFTA-e.

Hadži Jovan Mitrović konstatirao je da nema člana Komisije koji je protiv davanja mišljenja Predstavničkom domu za ratifikaciju CEFTA-e i pridružuje se prijedlogu prethodnika za preformulaciju zaključka Jerka Ivankovića Lijanovića, dodajući da nema pravne prepreke da Komisija ponovo usvoji zaključak.

Salko Sokolović podržao je prijedloge Ekrema Ajanovića i rekao da nema smetnji da Vijeće ministara BiH donese mjere i odluke za stimulaciju domaće proizvodnje u prijelaznom periodu.

Komisija je jednoglasno s obrazloženjem usvojila sljedeći **z a k l j u č a k**:

1. Obavezuje se Vijeće ministara BiH da, u skladu s članom 23. bis Sporazuma o izmjeni i pristupanju Centralnoevropskom sporazumu o slobodnoj trgovini, donese odluke koje će stupiti na snagu danom primjene Sporazuma, kojim će se naplaćivati MFN carine iz carinske tarife BiH, tj. ista visina carine kao na robu porijeklom iz EU na tarifne oznake 02,04,16, na robu porijeklom iz Republike Hrvatske i Republike Srbije, kako bi Komisija za vanjsku trgovinu i carine dala mišljenje Predstavničkom domu za ratifikaciju Sporazuma.
2. Komisija predlaže Vijeću ministara BiH da razmotri mogućnost donošenja odluka iz drugih oblasti za koje utvrdi da su neophodne.
3. Obavezuje se Vijeće ministara BiH da Komisiji dostavi odgovor do 30. juna 2007. godine.

O b r a z l o ž e n j e

Uzimajući u obzir da, na osnovu člana 10. i člana 13. Ugovora o slobodnoj trgovini s Republikom Hrvatskom i Republikom Srbijom, postoji odluka Vijeća ministara BiH o naplati MFN carine u iznosu od 40% od MFN carine iz carinske tarife koja prestaje stupanjem na snagu CEFTA-e, te da ta odluka nije imala dovoljno efekata u pravcu smanjenja deficita na tarife iz tarifnih oznaka 02,04,16 što se jasno vidi iz analiza koje su u prilogu, potrebno je donijeti odluku na osnovu člana 23. bis Sporazuma o izmjeni i pristupanju Centralnoevropskom sporazumu o slobodnoj trgovini s naplatom carine iz carinske tarife, kako bi se zaustavio i počeo smanjivati deficit kod ovih poljoprivrednih proizvoda.

Dogovoreno je da se zaključak uputi predsjedavajućem Vijeća ministara BiH, Ministarstvu vanjske trgovine i ekonomskih odnosa BiH i Vanjskotrgovinskoj komori BiH.

Ad-2.

Ponovno razmatranje i utvrđivanje konačnog Prijedloga zakona o izmjenama i dopunama Zakona o akcizama BiH, Zakona o carinskoj tarifi BiH i Zakona o carinskoj politici BiH

Predsjedavajuća Komisije Snježana Rajilić rekla je da je s predsjedavajućim Vijeća ministara BiH i ministrom vanjske trgovine i ekonomskih odnosa BiH, u ime Komisije, razgovorala o navedenim zakonima. Praksa je da Vijeće ministara BiH osnuje radne grupe za izradu prijedloga teksta zakona, izmjena i dopuna zakona i angažira resorna ministarstva za izradu teksta prijedloga zakona uz koordinaciju s UIO BiH i Ministarstvom finansija i trezora BiH.

U raspravi su učestvovali: Šemsudin Mehmedović, Slavko Jovičić, Snježana Rajilić, Mehmed Suljkanović i Jozo Križanović.

Zaključeno je da su prijedlozi izmjena i dopuna zakona sačinjeni na osnovu usvojenog zaključka Okruglog stola, održanog 13. marta 2007.; da su nacrti zakona razmatrani na 4. sjednici Komisije, održanoj 11. aprila 2007., kada su dostavljeni i članovima Komisije i da je bilo dovoljno vremena da se dostave primjedbe i preduzmu određene aktivnosti. Od UOUIO BiH dostavljeno je mišljenje o finansijskim efektima za prijedloge Zakona o izmjenama i dopunama Zakona o

carinskoj tarifi BiH (12. 6. 2007.) i za Prijedlog zakona o izmjenama i dopunama Zakona o carinskoj politici BiH (29.6.2007.), a za analizu finansijskih efekata Prijedloga zakona o izmjenama i dopunama Zakona o akcizama BiH, s obzirom na obimnost posla, bit će dostavljeno naknadno.

Komisija je jednoglasno **z a k l j u č i l a** da Radna grupa u sastavu: Snježana Rajilić, Jerko Ivanković Lijanović, Šemsudin Mehmedović i Ekrem Ajanović, 19. juna 2007. u Jelahu, utvrdi konačan tekst izmjena i dopuna navedenih zakona koji će biti dostavljen u redovnu proceduru predsjedavajućem Predstavničkog doma Parlamentarne skupštine BiH.

Ad-3.

Tekuća pitanja

Jednoglasno je zaključeno da materijali koje su Komisiji uputili:

1. Mesna industrija „Farmer“ iz Širokog Brijega, od 24.5.2007.;
2. Udruženje proizvođača i prerađivača mesa u BiH, od 1.6. 2007. ;
3. dopis Ministarstva vanjske trgovine i ekonomskih odnosa BiH– Ured za veterinarstvo BiH, od 4.6.2007.,
budu dostavljeni u proceduru Radnoj grupi za poljoprivredu, koja je osnovana na osnovu zaključka sa 4. sjednice Komisije.

Sjednica je završena u 20 sati.

Sekretar Komisije
Emira Češljarić

Predsjedavajuća Komisije
Snježana Rajilić